

Jabatan Fizik bersungguh sambut merdeka

SERDANG – Sambutan Hari Kemerdekaan Malaysia ke-48, peringkat Jabatan Fizik, Fakulti Sains, UPM diadakan di Dataran Sains dalam suasana yang penuh meriah dan harmoni.

Acara sambutan yang dijalankan adalah bersesuaian dengan seruan kerajaan bagi menyemarakkan lagi sambutan Kemerdekaan Malaysia di kalangan warga Malaysia tidak kira di mana mereka berada.

Menurut Pengerusi sambutan, Prof Madya Dr. Sidek Abdul Aziz, program yang diatur bagi kali ke tiga ini bertujuan menyemai semangat patriotik

dan sayang kepada negara di kalangan warga jabatan yang terdiri dari ahli akademik, pegawai sokongan dan pelajar-pelajar.

Katanya lagi, di samping menghargai dan menghayati erti kemerdekaan yang sebenar, jiwa rakyat Malaysia perlulah sentiasa diisi dengan sifat patriotik dan bersikap positif demi cintakan Malaysia.

Dekan Fakulti Sains, Prof Dr. Wan Md Zin Wan Yunus, menyempurnakan upacara perasmian sambutan dan turut terlibat dalam semua acara sambutan. Apa yang menariknya, sambutan dimulakan dengan per-

arakan Jalur Gemilang yang diketuai sendiri oleh Dekan Fakulti Sains dan Ketua Jabatan Fizik, Prof Madya Dr Zainal Abidin Talib.

Perarakan juga turut disertai lebih dari 150 pegawai dan pelajar, di sekitar kampus UPM dengan diiringi dengan nyanyian berirama patriotik dan laungan "Merdeka! Merdeka! Merdeka!".

Keadaan cuaca yang panas pada jam 3.00 petang hari tersebut tidak mematahkan semangat peserta-peserta perarakan.

Semasa berucap, Dr. Wan Md Zin menegaskan "Segenap rakyat Malaysia kini dapat mengecapi nikmat kemerdekaan hasil

perjuangan tokoh-tokoh dan para pejuang kemerdekaan tanahair di era 40-50an. Kita sebagai rakyat Malaysia perlulah menyemai sikap cintakan Negara dan tanah air".

Acara sambutan diserikan lagi dengan ucapan kemerdekaan dari pegawai dan pelajar pascasiswazah antarabangsa terutama dari Romania, India, Pakistan, Bangladesh, Jepun, Indonesia serta dari rakyat Malaysia sendiri.

Mereka telah menyampaikan ucapan dalam bahasa ibunda mereka dan kemudiannya diikuti oleh terjemahannya dalam bahasa Inggeris dan juga bahasa

Melayu.

Nyayian secara marathon 6 lagu patriotik termasuk lagu Negeraku, Putra Gemilang, 31 Ogos, Jalur Gemilang, Keranamu Malaysia serta Warisan benar-benar menaikkan semangat para hadirin.

Manakala persembahan bertemakan 'Kemerdekaan' dari para pelajar prasiswazah dan pascasiswazah serta pegawai Jabatan Fizik menggamatkan suasana sambutan tersebut. Hadiah-hadiah pemenang bertuah dan juga pemenang ucapan dan puisi kreatif Kemerdekaan telah disampaikan oleh Dekan Fakulti Sains.